

بياع الدهن

في السنين الماضية يوم كانوا الناس يشتغلون بالحجر والطين والفلاحة وشغل الحرفة لاهل الديرة نفسها مهوب للناس اللي برا، فمثلا استاد البنيان ياخذ العمال القويين والنشاط واذا شاف له واحد ضعيف قال له باكر لاتصبح ولا تجي للعمل تراك ماتصلح وفيه ناس مثلا يشتغلون مع العمال بالجاجة اللي هي انه يشتغل بملي بطنه يعشونه او يغدونه بدون راتب، الحاصل، انه مره من المرات هاك الولد جا لقرية من قرايا نجد ولد شاب عمره في حدود ١٩ سنه او عشرين الى واحد وعشرين سنه لكنه ماشاء الله زارق شبابه طويل ونحيف وجاي يترزق الله من قريته الى هالقريه ولا لاهله الا هو والى اهل هاقريه مشهورين ببيعهم وتجارتهم، اهل بيع وشرا دائما مع البدو، في السمن والاقط والصوف فالولد هذا يدور شغل وطبعا مافيه شدة لشغل الطين وشيل اللبن والشبي الثقيل وصار يدور شغل وكل من شافه نحيف قال مايصلح للشغل، لو ييشتغل مع واحد يبني ماله شدة يشيل لبن ولا له شدة يخلط الطين فجلس الولد يترزق الله لعله يشوف شغل، قعد له يوم يومين ثلاثة ايام ويوم من الايام مر واحد من تجار الديرة في السمن والاه يدور عامل رخيص يبي واحد بالجاجة ان حصل، يعني ملي بطنه لانه شحيح وبخيل ولا وده يتحمل راتب العامل، هالتاجر دور ولقي ذا الولد يوم شافه قال يا الله حيه من انت ولده؟ قال انا ولد فلان قال مالقيت شغل؟ قال لا مالقيت قال والله يا وليدي انت الظاهر بجسمك هذا ما ماضيت انك بتلقى شغل ان كان هذا مشيك وجسمك ما هقيت تلقى شغل، وكنك بعد منتب تاكل المهم انه حطمه

زيادة ولا شجعه، قال شف الله يصلحك يا وليدي اذا جا واحد بالجاجة قل ما يخالف اشتغل عنده ودور الرزق وهو قصده يبي يوبده وعقب يومين او ثلاثة مر من عند الولد الصبح والاه في وسط الديرة حول المسجد، هاه يالله حيه قال انت الى هالحين ما لقيت شغل قال لا والله ماكتب لي الله شغل، قال التاجر الظاهر اني ابشير عليك قم يا ولدي دور لك ديرة ثانية غير هذي يمكن ماكتب الله لك فيها رزق قال الولد لا بيرزقني الله ان شاء الله المهم عقب يومين رجع التاجر ولقاه الى هالحين مالقي شغل قال له تدري عاد مهوب باكر، عقبه ابلقى لك شغل ان شاء بس هاه الله الله لا يدري احد هاه قال زين ويوم جا نهار ثالث ويجيبيه والى الولد من اسرة طيبه وعليه ثوب خفيف حتى انه اذا جا يجلس يرفع ثوبه لا يتقطع ولا يرتكى على الجدار واجد ولا يتحكك به في الجدار ماعنده الا هذا الثوب وقام التاجر الشايب قال تعال وانا ابوك، يبي يشغله عنده وفعلنا راح معه لبيته يوم دخله ذاك الدهريز في بيته والى الشايب هذا شديد على الدنيا، قال شف يا ولدي انت في هالمكان لاتعلم احد، يخاف انه يطلب راتب يركده يبيه يرضى بالجاجة قال ان شاء الله مالك ياعم الا اللي يرضيك والولد هذا صحيح انه ضعيف ولكن جسمه نظيف ولا فيه عرق المهم ان التاجر هذا دخله في الدهريز والى فيه اللي يسمونه الاولين منقوله، المنقوله مثل الجمادان الي يجي فيها موية البطاريات بس انها كبيرة هالرجال هذا الي حنا نحكي عنه يشري من البدو السمن رخيص ويجمعه في هذي المنقولة ويخلطه جميع واذا امتلت المنقولة بدا يفرغه في تنك ويلحمهن ويجلبهن ويبيعهن.

المهم نادى الولد قال شف ترا هالدهريز مافيه احد ولا يمرك ولا يشوفك احد من اهل البيت وخلك مرتاح افصخ ثوبك وعلقه بهالوتد لاتخلي عليك الا

هالسروال ، قال شف هالتنك المصفوفة ترا ماهنا شغل يسوا وهو يبي يركده على شان ما يطلبه شي قال شفت ذي اللبنة ارق عليها واغرف السمن من المنقولة وعبه في التنكة وانتبه قم جب التنكة وقربها من المنقولة وصب السمن في التنكة شوي شوي وانتبه لاينكب السمن ترا السمن غالي شريناه بهاكالعده، يوم قرب الود التنكة شاف التاجر ان الولد بيغرف السمن بسرعة قال لا اصبر اوقف تعال خل التنكة ، شف وش تحت المنقولة قال الولد هذا اللي تحت المنقولة هذا نمل قال الشايب ايه نمل بس هو حي والا ميت.؟ قال ميت قال شف ليه ميت قال هذا ميت من الجوع لانا ماننقط السمن ومات من الجوع، هاه انتبه اذا جيت تصب صب بالهون وغط المغراف وقربه من اثم التنكة فهمت وانا ابوك؟ قال فهمت ودلى الولد يغرف ويصب السمن لين ماعاد بقي الا شوي بالمنقولة بس في قاعتها وصار ماعاد يطول ودلى يتطيلول كنك تشوفه يعرض برطمه الى صار يصب، المهم عبي التنك وقال للشايب هاه ياعم خلصت المنقولة قال لا لا افصح ثوبك وطب في المنقولة وابدا اسلت السمن من جيلان المنقولة، لين الولد غرف كل شي قال هاه خلصت قال لا والاه كلما غرف شوي عطاء مغرفة اصغر ويوم نشده هاه خلصت قال ايه قال لا خذ الملعقه كمل المهم يوم جا يطلع الولد من المنقولة والى جنوبه مليانة دهن قال خلاص ياعم مابقا شي اطلع قال لا تستعجل الحين ابدييك من المنقولة للشمس وشفني جايب طشت اطمر من المنقولة للطشت انت تدري ان نصف دهننا في جسمك بس لاتعجل لين اقول لك قال زين

قام الشايب يدريه لين حطه بالشمس قال هاه لاتطمر ولا تلمس رجلك الارض اطمر من المنقولة للطشت على طول ترا كل دهننا على جسمك قال طيب

وطمر والاه في الطشت وقعد في هالشمس، شمس حارة، الحاصل قام الشايب
يسلت ويحك جلد هالضعيف الوليد بهاك الملعقة لين صار جلده حمر كنك
مطلعه من ماء حار المهم ان الرجال اوذى هالضعيف الوليد اوذاه بالشغل ما
صدق الولد يفتك منه المهم هالولد قال الله لا يعينه ولا شغله وراح يدور شغل
ثاني.

المهم ذكرتني هالقصة بابيات حول الموضوع فيه بيتين لحميدان الشويعر وهو
حمد بن ناصر السيارى يقول:

الى جاك الولد بيديه طين
ومن حرثه وشغله بالحفارة
ترا هذاك ما ياخذ زمان
الا هو جامع عنده تجارة
والى جاك الولد زملوق خندق
ومن نوم الصفر غاش اصفارة
فحذرا يا اديب تحط عنده
الك بنت تموت بجحر داره
هذا قول حميدان، وقول ابراهيم بن جعيش الله يرحمه يقول بهالموضوع:
خطو الولد يامال هزل الغظاريف
بالعجز يلحقه الكتب في ضلافه

يمشي بذل وعيشة الراس تكسيف
والبيض يسقنه من الماء عذافه
ماشاف شوفات العيال الغطاريف
للرزق يبذل همته واحترافه
يعذر الا طق الصفا بالمغاريف
بالبعد عن دار كثير عيافه
قلته وانا مالي على الناس تصريف
انصح وسيفي مغمد في غلافه
اسعى لرزقي بالمشي والتواقيف
ارجي لعل الحظ تسمن ضعافه
في نجد حول وتارة نسكن السيف
عن تاجر يدور فينا الحتافه
اصبر ولو ثوبي على الساق ورهيف
بالستر يا زينه ولو هو لفافه
الى ان قال:

الرزق عند محزم الغرس يالليف
جميع مايخفى على الناس شافه
وصلاة ربي عد دار العواصيف
على النبي ما حصى الملبي طوافه

هذي قصه فيها عبره حقيقه للحث على طلب الرزق وعن بعض هالناس
المقترين البخلاء ولاشك ان شغل هالولد عند هالرجال البخيل طلعه رجال
وعرف ان القرش يجيب القرش واللي علموني بهالسالفه هذي يقولون ان هالولد
صار من اكبر تجار الدهن بسبب ما تعلمه من هالشايب ومن حرصه على الريال.

